

























古樂苑前卷

西吳 梅鼎祚 補正

東越 呂胤昌 校閱

古歌辭

昔葛天八閔爰乃皇時黃帝雲門理不空綺堯有  
大唐之詠舜造南風之詩大禹成功九叙惟歌太  
康敗德五子咸怨其來久矣逮夫漢武崇禮樂府  
始興自後郊廟燕射悉著篇章諸調雜舞多被絃  
筦雖新聲代變厥有繇然今故特錄古歌庸置首  
簡其他琴曲歌謠後各類次不復繁茲若夫塗山  
歌於候人有娥謠乎飛燕夏甲歎於東陽殷  
鼂思于西河凡斯之屬名存辭佚亦具紀焉

彈歌

吳越春秋曰越王欲謀復吳范蠡進善射  
者陳音音楚人也越王請音而問曰孤聞  
子善射道何所生音曰臣聞弩生于弓弓生  
於彈彈起于古之孝子不忍見父母爲禽獸





斷竹續竹飛土逐穴

續一作屬穴古肉字今吳越春秋作害非

所食故作彈以守之乃歌曰劉勰云黃歌斷竹質之至也又曰斷竹黃歌乃二言之始

皇娥歌

王子年拾遺記曰少昊以金德王母曰皇娥處璇宮而夜織或乘桴木而晝遊

經歷窮桑滄茫之浦時有神童容貌絕俗稱為白帝之子即太白之精降乎水際與皇娥讌戲並坐撫桐峯梓瑟皇娥倚瑟而清歌云云白帝子答歌云云及皇娥生少昊號曰窮

桑氏

皇娥

天清地曠浩茫萬象廻薄化無方滄天蕩蕩望滄滄

乘浮輕漾著日傍當期何所至窮桑心知和樂悅未央

白帝子歌

白帝子

四維八埏眇難極驅光逐影窮水域璇宮夜靜當軒織



桐峰文梓千尋直伐梓作器成琴瑟清歌流暢樂難極

滄溟海浦來棲息

楊慎云拾遺記全無憑證直構虛空首謂少昊母有桑中之行猶為悖亂

被衣歌

莊子曰齧缺問道乎被衣被衣曰若止汝形一汝視天和將至攝汝知一汝度

神將來舍神將為汝美道將為汝居汝瞳焉如新生之犢而無求其故其言未卒齧缺睡寐被衣大說行歌而去之

被衣

形若槁骸心若死灰真其實知不以故自持媒媒晦晦

無心而不可與謀彼何人哉

謀叶蒲杯反哉叶戕西反故事也物不入於心故曰

不以故自持媒媒晦晦芒忽無見也

箕山歌

古今樂錄曰許由者古之貞固之士也堯時為布衣以清節約聞於堯堯乃遣

使禪為天子由喟然歎曰匹夫結志固如磐石採山飲河所以養性非以貪天下也堯既



祖落乃作箕山之歌博物志曰司馬遷云無堯以天下讓許由事楊雄亦云誇大者爲之

許由

登彼箕山今瞻望天下山川麗崎萬物還普日月運照  
靡不記睹遊放其間何所却慮歎彼唐堯獨自愁苦勞  
心九州憂勤后土謂予欽明傳禪易祖我樂何如蓋不  
盼顧河水流今緣高山甘瓜施今葉綿蠻高林肅兮相  
錯連居此之處傲堯君

下古音虎虞山蠻君並叶

賡歌

三章

虞書帝庸作歌曰勅天之命惟時

念哉率作興事慎乃憲欽哉屢省乃成欽哉  
乃康載歌曰云云臯陶又歌曰云云  
勅天之命二句作歌乃者  
繼事之辭歌已復歌曰乃  
虞舜  
史記



股肱喜哉元首起哉百工熙哉

臯陶歌

元首明哉股肱良哉庶事康哉

元首叢脞哉股肱惰哉萬事墮哉

卿雲歌

三章

樂府集載尚書大傳曰舜將禪

禹於是俊乂百工相和而歌卿雲帝唱之八伯咸進稽首而和帝乃再歌尚書大傳曰維五祀奏鐘石論人聲乃及鳥獸咸變於前秋養耆老春食孤子乃淳然招樂興於大麓之野報事還歸一年譖然乃作大唐之歌歌者二年昭然乃知乎王世明有不世之義招爲賓客而雍爲主人始奏肆夏納以孝成舜爲賓客而禹爲主人樂正進贊曰尚考大室之義唐爲虞賓至今衍於四海成禹之變垂於萬世之後帝乃唱之曰云云人伯咸進稽首曰云云帝乃載歌曰云云於時八風循



道卿雲叢萋蟠龍憤信於其藏蛟龍躍踊於其淵龜龍咸出於其穴遷虞而事夏也史記天官書曰若煙非煙若雲非雲郁郁紛紛蕭索輪囷是謂慶雲益和氣也舜時有之故美之而

虞舜

作歌

卿雲爛兮糺縵縵兮日月光華旦復旦兮

糺諸本作禮誤復一作或

八伯歌

明明上天爛然星陳日月光華弘于一人

天叶弘于樂書作宏予

帝載歌

日月有常星辰有行四時順經萬姓允誠於予論樂配天之靈遷于賢善莫不咸聽龔乎鼓之軒乎舞之菁華已竭褰裳去之

行經誠靈聽並叶善一作聖去叶上聲



候人歌

呂氏春秋曰禹行功見塗山之女禹未之遇而巡省南土塗山氏之女乃今其

妾待禹於塗山之陽女乃作歌曰

塗山氏

候人兮猗

塗山歌

吳越春秋曰禹年三十未娶行塗山恐時之幕失其度制乃辭云吾娶也必有

應矣乃有白狐九尾造於禹禹曰白者吾之服也九尾者王之證也於是塗山之人歌之禹因娶塗山謂之女嬌呂氏春秋曰禹年三十未娶行塗山有白狐九尾造禹塗山人歌曰綏綏白狐九尾麗麗成子家室乃都攸昌禹遂娶之

綏綏白狐九尾麗麗我家嘉夷來賓爲王成子室家我

都攸昌天人之際於茲則行明矣哉

成子室家我都攸昌一作成家成室

我造彼昌行明並叶



五子歌

五章 夏書太康尸位以逸豫滅厥德黎民咸貳乃盤游無度政于有洛之表

有窮后羿因民弗忍距于河厥弟五人御其母以從後于洛之汭五子咸怨述大禹之戒

以作歌

夏五子

皇祖有訓民可近不可下民惟邦本本固邦寧予視天下愚夫愚婦一能勝予一人三失怨豈在明不見是圖予臨兆民慄乎若朽索之馭六馬爲人上者奈何不敬訓有之內作色荒外作禽荒甘酒嗜音峻宇雕牆有一于此未或不亡

惟彼陶唐有此冀方今失厥道亂其紀綱乃底滅亡

楊慎

云左傳引書五子之歌有此冀方今失其行其行今文作厥道按古文術從行中人又音道石鼓文我水旣靜



伐術既平五子歌以術叶方綱當從平音道路之行如  
景行字作術人之雁行足行當作斯見龜筮傳陳耀文  
正揚云龜筮傳聖人剖其心壯士斬其肱注  
肱音衡脚脛也亦非斯字肱可直謂之行乎

明明我祖萬邦之君有典有則貽厥子孫關石和鈞王

府則有荒墜厥緒覆宗絕祀

孫叶祀叶  
養里反

嗚呼曷歸予懷之悲萬姓仇予予將疇依鬱陶乎予心

顏厚有怙悌弗慎厥德雖悔可追

炮烙歌

符子曰桀觀炮烙於瑤臺謂龍逢曰樂乎龍逢曰樂又曰觀刑樂乎龍逢曰天

下苦之而君為樂臣觀君冕非冕也冕危石也臣觀君履非履也履春冰也未有冠危石而不壓履春冰而不陷者桀歎曰子知我之  
亡而不自知其亡子就炮烙之刑吾觀子亡

我不亡龍  
行歌曰

關龍逢



造化勞我以生休我以炮烙乎

路史辨云夫危石春水言之不倫顧豈逢之語

而炮烙之事攷之書則紂之行不聞其爲桀也吾不敢盡信

哀慕歌

古今樂錄曰周太伯者太王之長子也

子昌卽文王也太王寢疾欲傳季歷以及昌於是太伯與虞仲去被髮文身託爲王採藥後聞太王卒還葬喪哭於門示夷狄之人不得入王庭季歷謂太伯長子也當立垂涕而留之終不肯止遂委而去適於吳季歷作哀慕之章

周季歷

先王旣殂長實異都哀喪腹心未寫中懷追念伯仲我

季如何梧桐萋萋生千道周宮館徘徊臺閣旣除何爲

遠去使此空虛支骨離別垂思南隅瞻望荆越涕淚交

流伯兮仲兮逝肯來遊自非二人誰訴此憂

賁音允懷音窠衝波



傳人知其一不知其他子生三年然後免於父母之懷  
周淳于切三國志李與表孔明問文漢高歸魂于豐沛  
太公五世而反周想魍魎之彷彿冀形響之  
有餘館風雅逸篇作舒云舒古榭字一作觀

### 夢歌

一作瓊瑰歌左傳曰聲伯夢涉洹或與已

云云懼不敢占也還自鄭至於狸脈而占之  
曰余恐死故不敢占今衆繁而從余三年矣  
無傷也言之  
之暮而卒

### 魯聲伯

濟洹之水贈我以瓊瑰歸乎歸乎瓊瑰盈吾懷乎

葉

### 去魯歌

一作師已歌史記曰孔子相魯齊人遺  
女樂季桓子受之三月不聽政郊又不

致膳俎於大夫孔子遂行宿乎屯而師已送  
曰夫子則非罪孔子曰吾歌可大歌曰云云  
桓子聞之曰夫子罪我以羣婢故也史記仲  
尼正樂以誘世作五章以刺時索隱曰優哉  
遊哉聊以卒歲此五章之次楊慎云楊子五  
百篇孔子因女樂去魯曰不聽政諫不用雉



噫注雉噫猶歌歎之聲梁鴻五噫之類琴操  
彼婦云云此卽雉噫之歌也衝波傳云云楊  
子所云雉噫者指此唐人碑文聆鳳  
哀於南楚歌雉噫於東魯亦用楊子

魯孔子 下同

彼婦之口可以出走。彼婦之謁可以死敗。蓋優哉游哉。

維以卒歲。

敗叶蒲昧反家語無蓋字維家語作聊王肅  
曰言婦人之口請謁足以憂使人死敗故可

以出走也仕不遇  
故且優游以終歲

衝波傳曰孔子相魯齊人懼而欲敗其政選  
齊國好女八十人皆衣文衣而舞容穠季桓  
子語魯君爲周道游館孔子乃行觀雉之飛  
鳴歎曰梁山雌雉時哉時哉色斯舉矣翔而  
後集因爲雉  
噫之歌曰

彼婦之口可以出奏。彼婦之謁可以死北。優哉游哉聊。



以卒歲

楚聘歌

一作大道歌孔叢子曰楚王使使奉金幣聘夫子宰予冉有曰夫子之道至是

行矣遂請見問曰太公勤身苦志八十而遇文王孰與許由之賢子曰許由獨善其身者也太公兼利天下者也然今世無文王雖有太公孰能識之乃歌曰楚昭王

大道隱兮禮爲基賢人竄兮將待時天下如一兮欲何

之

丘陵歌

陸賈新語作丘公陵歌孔叢子曰哀公使以幣如衛迎夫子而不能賞故夫子

作丘陵之歌註言昏主之道難且險若丘陵然故作是歌以託意

登彼丘陵蒨施其阪仁道在邇求之若遠遂迷不復自

嬰屯蹇喟然迴慮題彼泰山鬱確其高梁甫迴連枳棘



充路陟之無緣將伐無柯患茲蔓延惟以永歎涕賁潺

湲

列苑崎嶇也丘陵既高且險其阪又崎嶇相屬丘陵謂王室也阪指諸侯題顧也泰山謂魯也言歷諸國

既無所用復顧魯鬱確其高言公室既鬱確而險大夫又亂如枳棘欲伐云又無斧柯梁甫太山之下小山指

三桓也邇

一作近

蟋蟀歌

詩含神霧曰孔子歌曰云云政尚靜而惡譁也

遶山十里蟋蟀之聲猶尚在耳

鷓鴣歌

韓詩內傳曰孔子渡江見鷓鴣異之衆莫能名孔子曰嘗聞河上人歌云大載

禮注引韓詩內傳云鷓鴣胎生孔子渡江見而異之白澤圖云昔孔子子夏所見故歌之

其頭九首今呼爲九頭鳥也文選江賦龍鯉一角奇鷓九頭注劉駒駢玄恨賦云一足之

鷓九頭之鷓西陽襍俎云白澤圖謂之鷓鷃帝鵠書謂之逆鷓裴瑜所註爾雅言鷓鷃鵠



是九頭鳥也小說周公居東周惡聞此鳥命庭氏射之血其一首餘猶九首按孔子鶉歌

逆毛鶉兮一身九尾長

兮只言九尾不言九頭

鶉兮鶉兮逆毛哀兮一身九尾長兮

衝波傳有鳥九尾孔子與子夏見之人以問孔子曰鶉也子夏曰何以知之孔子曰河上之歌

云

鶉兮鶉兮逆毛哀兮一身九尾長兮

孤鶉歌

類要曰孔子遊于隅山見取薪而哭長梓上有孤鶉乃承而歌之

鶉彼鳴鶉在巖山之吟

叶其淹反

獲麟歌

孔叢子曰叔孫氏之車子鉏商樵於野而獲麟焉衆莫之識以爲不祥棄之五

父之衢冉有告曰麋身而肉肉豈天之妖乎夫子往觀焉泣曰麟也麟出而死吾道窮矣



和平語人自深此聖人之言也

乃歌

唐虞世今麟鳳遊。今非其時來何求。麟兮麟兮我心憂。

原壤歌

禮記檀弓曰孔子之故人曰原壤其母死夫子助之沐櫛原壤登木曰久矣子

之不託於音也歌曰云云夫子為弗聞也而過之或曰此即射義所謂狸首逸詩也

狸首之斑然執女手之卷然

狸首之斑言木文之華也卷與拳同如執女手之拳

言沐櫛之滑膩也斑叶卑連反

曳杖歌

一作夢奠歌亦見家語檀弓曰孔子蚤

而入當戶而坐子貢聞之曰泰山其頽則吾將安仰梁木其壞哲人其萎則吾將安放遂趨而入夫子曰予疇昔之夜夢奠於兩楹之間夫明王不興而天下其孰能宗予予殆將死也蓋寢疾七日而終



泰山其頽乎梁木其壞乎哲人其萎乎

壞叶

黃鵠歌

列女傳曰魯陶嬰者陶明之女也少寡養幼孤無彊昆弟紡績爲產魯人或聞其義將求焉嬰聞之恐不得免乃作歌明已之不更二庭也魯人聞之遂不敢復求

陶嬰

悲夫黃鵠之早寡兮七年不雙宛頸獨宿兮不與衆同  
夜半悲鳴兮想其故雄天命早寡兮獨宿何傷寡婦念  
此兮泣下數行嗚呼哀哉兮死者不可忘飛鳥尚然兮  
況於貞良雖有賢雄兮終不同行

雙行並叶

烏鵲歌

韓憑戰國時爲宋康王舍人妻何氏美王欲之捕舍人築青陵臺何氏作烏鵲歌以見志遂自縊死二首見彤管集

一作青陵臺歌見九域志止前一首



宋韓憑妻何氏

南山有鳥北山張羅鳥自高飛羅當奈何

烏鵲雙飛不樂鳳皇妾是庶人不樂宋王

妙在留直唐孟郊列女操  
波瀾搖言不起妾心井中水此一  
種也

答夫歌

其雨淫淫河大水深日出當心

康王得書以問蘇賀賀曰雨淫淫愁且思也河

水深不得往來也日當心有死志也俄而憑自殺妻亦死

語特奇初

飯牛歌

淮南子曰甯越欲干齊桓公困窮無以自達於是為商旅將任車以商於齊莫

宿於郭門外桓公郊迎客夜開門辟任車爝火甚眾越飯牛車下擊牛角而疾商歌桓公

聞之曰異哉非常人也命後車載之因授以政越一作戚螭笑外稿云此歌不類春秋時

人語蓋後世所擬者高誘註呂氏春秋謂戚所歌乃詩碩鼠之辭雖未見所據亦可驗南



山白石之歌誘未之見也然其辭亦激烈足以動人齊寧戚

南山矸白石爛生不逢堯與舜禪短布單衣適至矸從

昏飯牛薄夜半長夜漫漫何時旦矸音岸叶魚戰反爛叶郎旬反矸音幹叶

同矸半叶彼卷反旦叶都卷反

末句感慨

滄浪之水白石粲中有鯉魚長尺半弊布單衣裁至矸

清朝飯牛至夜半黃犢上阪且休息吾將捨汝相齊國

出東門兮厲石斑上有松柏青且闌麤布衣兮組纓時

不遇兮堯舜主牛兮努力食細草大臣在爾側吾當與

爾適楚國草叶脞五反此首見劉向別錄楊慎云寧戚飯牛歌康浪之水白石爛康浪水在今山

東見一統志可考樂府誤作滄浪之水滄在楚與齊何涉駱賓王文云觀梁父之曲識臥龍於孔明聽康浪之



歌得飯牛於甯戚此可以證近刻略

自命大臣何等自負適楚國即后世北走胡南走越意戰國策士之習已萌于此

狐裘歌

一作狐裘詩左傳晉侯使士蔭為二公子築蒲與屈不慎置薪焉夷吾訴之公

使讓之士蔭對曰臣聞之無喪而感憂必讐焉無戎而城讐必保焉寇讐之保又何慎焉詩曰懷德惟寧宗子維城君其脩德而固宗子何城如之三年將尋師焉焉用慎退而賦

曰

晉士蔭

狐裘尫茸一國三公吾誰適從

尫茸亂貌言貴服多也公與二子為三適專主

也言城不堅則為公子所訴為公所讓堅之則為固讐不忠故不知所從

暇豫歌

國語曰晉優施通于驪姬姬欲害申生而難里克優施乃飲里克酒中飲優施

起舞曰云云里克笑曰何謂苑何謂枯優施曰其母為夫人其子為君可不謂苑乎其母既死其子又有謗可不謂枯乎枯且有傷里克懼乃定中立之計



優施

暇豫之吾吾不如鳥鳥人皆集於苑已獨集於枯

暇閑豫樂

也吾吾不敢自親之貌言里克欲為暇豫事君之道反不敢自親吾吾然其智曾不如鳥鳥苑茂木也已里克也喻人皆與奚齊克獨與申生也吾讀如魚

舟之僑歌

說苑曰晉文公出亡舟之僑去虞而從焉文公反國擢可爵者而爵之擢

可祿者而祿之舟之僑獨不與文公酌諸大夫酒酒酣文公曰二三子盍為寡人賦乎僑曰君子為賦小人請陳其辭遂歷階而去文公求之不得

舟之僑

有龍矯矯頃失其所一虵從之周流天下龍反其淵安

寧其處一虵耆乾獨不得其所

此與介子推事同

河激歌

列女傳曰女娟者趙河津吏之女也簡子南擊楚津吏醉臥不能渡簡子怒欲



殺之娟懼持楫走前曰願以微軀易父之死  
簡子遂釋不誅將渡用楫者少一人娟攘拳  
操楫而請簡子遂與渡中流爲簡  
子發河激之歌簡子歸納爲夫人

### 女娟

升彼河兮而觀清水揚波兮冒冥冥禱求福兮醉不醒  
誅將加兮妾心驚罰既釋兮瀆乃清妾持楫兮操其維  
蛟龍助兮主將歸呼來權兮行勿疑

### 優孟歌

史記滑稽傳楚相孫叔敖病且死屬其

窮困負薪逢優孟曰我孫叔敖子也父死時  
屬我貧困往見優孟孟即爲孫叔敖衣冠抵  
掌談語歲餘像孫叔敖楚王置酒優孟前爲  
壽莊王大驚以爲孫叔敖復生也欲以爲相  
優孟曰楚相不足爲也孫叔敖爲楚相盡忠  
爲廉王得以伯今死其子貧困負薪以自飲



食必如孫叔敖不如自殺因歌曰云  
云莊王乃召孫叔敖子而封之寢丘

### 楚優孟

山居耕田苦難以得食起而爲吏貪鄙者餘財不顧耻  
辱身死家室富又恐受賊枉法爲姦觸大罪身死而家  
滅貪吏安可爲也念爲廉吏奉法守職竟死不敢爲非

廉吏安可爲也

風雅逸篇曰按此無音韻章句而史以爲歌曰不可曉豈當時纒括轉換借歌

聲以成之歟史不能述其音但記其義也又曰劉子玄譏此事之妄幻然此傳以滑稽名乃優孟自爲寓言爾

### 忼慨歌

一作楚商歌文章流別孫叔敖碑曰叔敖臨卒將無棺槨令其子曰優孟

曾許千金貸吾孟故楚之樂長與相君相善雖言千金實不貸也卒後數幸莊王置酒以爲樂優孟乃言孫君相楚之功卽忼慷高歌涕泣數行下若投首王王心感動



覺悟問孟子孟具列對  
即來其子而加封焉

貪吏而可為而不可為廉吏而可為而不可為貪吏而  
不可為者當時有汚名而可為者子孫以家成廉吏而  
可為者當時有清名而不可為者子孫困窮被褐而負  
薪貪吏常苦富廉吏常苦貧獨不見楚相孫叔敖廉潔  
不受錢貧叶類  
眠反  
將廉吏之不可為說透而主意于末一語綴出情深語竭楚王聽之不覺自

### 申包胥歌

吳越春秋曰子胥以吳兵伐楚入郢  
昭王出奔申包胥乃之秦求救倚哭

於秦庭七日七夜口不絕聲哭已歌曰云云  
桓公大驚曰楚有賢臣若此吳猶欲滅之寡  
人無臣若斯者其亡無日矣為賦  
無衣之詩出師而送之桓當作哀

### 申包胥



吳為無道封豕長蛇以食上國欲有天下政從楚起寡

君出在草澤使來告急

澤叶直挖反 傳亦載不云歌 左

### 漁父歌

一作渡伍員歌吳越春秋曰伍子胥逃楚與楚太子建奔鄭晉頃公欲因太子

謀鄭鄭知之殺太子建伍員奔吳追者在後至江江中有漁父子胥呼之漁父欲渡因歌曰云云子胥止蘆之漪漁父又歌曰云云既渡漁父視之有饑色曰為子取餉漁父去子胥疑之乃潛深葦之中父來持麥飯鮑魚羹盜漿求之不見因歌而呼之曰云云子胥出飲食畢解百金之劍以贈漁父不受問其姓名不答子胥誠漁父曰掩子之盜漿無令其露漁父諾胥行數步漁者覆船自沈於江

### 楚漁父

日月昭昭乎寢已馳與子期乎蘆之漪

乎一作兮 絕載漁父歌云

日昭昭侵以施與子期甫蘆之碕 越絕漁父歌曰昭昭浸以晞晞日斜也 遠左東晞縣賈誼賦日斜庚子斜



音移

右一

日已夕兮予心憂悲月已馳兮何不渡為事寢急兮將

奈何

右二

蘆中人蘆中人豈非窮士乎

合上章為為韻右三

其声愈促

接輿歌

論語楚狂接輿歌而過孔子曰云云列仙傳曰陸通者楚狂接輿也好養生遊

諸名山嘗遇孔子而歌

陸通

鳳兮鳳兮何德之哀往者不可諫來者猶可追已而已

而今之從政者殆而

殆叶養里切

莊子曰孔子適楚楚狂接輿遊其門曰

鳳兮鳳兮何如德之哀也來世不可待往世不可追也



天下有道聖人成焉天下無道聖人生焉方今之時僅免刑焉福輕乎羽莫之知載禍重乎地莫之知避已乎已乎臨人以德殆乎殆乎畫地而趨迷陽迷陽無傷吾行吾行卻曲無傷吾足

成謂可以成功生全生而已困學紀聞曰胡明仲云荆楚有草

叢生脩條

野人呼為迷陽其膚多刺故曰無傷吾行無傷吾足

而臨人也

趨古音促言自拘束

高士傳所載無傷吾

足之後有云山木自寇也膏火自煎也桂可食故伐之漆可用故割之人皆知有用之用而

聖人生焉謂使生于世也

不知無用之用也按此亦不云歌

孺子歌

孟子曰有孺子歌曰云云孔子曰小子聽之清斯濯纓濁斯濯足矣自取之也

文章正宗作滄浪歌

孺子

滄浪之水清兮可以濯我纓滄浪之水濁兮可以濯我



足

濁叶厨主反 此亦載  
楚辭漁父我並作吾

混混之水濁可以濯吾足乎泠泠之水清可以濯吾

纓乎

文子載  
滄浪歌

王子思歸歌

楚之王子  
質于秦作

王子

洞庭兮木秋涔陽兮草衰去千乘之家國作咸陽之布

衣

怨錄

越人歌

劉向說苑曰鄂君子皙汎舟於新波之  
中乘青翰之舟張翠蓋會鐘鼓之音畢

榜枻越人擁楫而歌於是鄂君乃揄脩袂行  
而擁之舉繡被而覆之鄂君楚王母弟也

今夕何夕兮牽洲中流今日何日兮得與王子同舟蒙

羞被好兮不訾詬耻心幾煩而不絕兮得知王子山有



木○今○木○有○枝○心○說○君○今○君○不○知○

与思字音未敢言同一婉至

庚癸歌

左傳魯哀公十三年公會渾平公晉定公吳夫差于黃池吳申叔儀作歌乞糧於公孫有山氏有山氏對曰梁則無矣粗則有之若登首山以呼曰庚癸乎則諾註軍中不得出糧故為私隱庚西方主穀癸北方主水傳言吳子不與士共饑渴所以取亡也

吳申叔儀

佩玉藥兮余無所繫之旨酒一盛兮余與褐之父睨之

藥然服飭備也已獨無以為繫佩言吳王不恤下一盛一器也褐寒賤之人言但視不得飲睨去聲

河上歌

吳越春秋曰楚白喜奔吳吳王闔閭以為大夫與謀國事吳大夫被離問子胥曰何見而信喜子胥曰吾之怨與喜同子不聞河上歌乎

同病相憐同憂相抃驚翔之鳥相隨而集瀨下之水因



復俱流胡馬望北風而立越鷺向日而熙誰不愛其所  
近悲其所思者乎

烏鳶歌

二首吳越春秋曰越王將入吳與諸大夫別於浙江之上羣臣垂泣越王夫人

顧烏鵲啄江渚之蝦飛去復來因歌曰

越王夫人

仰飛鳥兮烏鳶凌玄虛兮號翩集洲渚兮優恣啄蝦矯  
翩兮雲間任厥性兮往還妾無罪兮負地有何辜兮譴  
天飄獨兮西往孰知返兮何年心惓惓兮若割淚泫泫  
兮雙懸

還立月旋

彼飛鳥兮鳶鳥已迴翔兮翕蘇心在專兮素蝦何居食  
兮江湖徊復翔兮游颺去復返兮於乎始事君兮去家



終我命兮君都終來遇兮何辜離我國兮去吳妻衣褐  
兮爲婢夫去冕兮爲奴歲遥遥兮難極冤悲痛兮心惻  
腸千結兮服膺於乎哀兮忘食願我身兮如鳥身翱翔  
兮矯翼去我國兮心遙情憤惋兮誰識風雅逸篇註曰吳越春秋作於後漢人所載事多不實此歌依託無疑

### 采葛婦歌

吳越春秋曰越王自吳還國勞身苦心懸膽於戶出入嘗之知吳王好服之被體使國中男女入山采葛作黃絲之布以獻之吳王乃增越之封賜羽毛之飭机杖諸侯之服越國大悅采葛之婦傷越工用心之苦乃作若之何詩曰

### 采葛婦

葛不連蔓茶台台我君心苦命更之嘗膽不苦甘如飴



令我采葛以作絲女工織兮不敢遲弱於羅兮輕霏霏  
號絺素兮將獻之越王悅兮忘罪除吳王歡兮飛尺書  
增封益地賜羽奇机杖茵蓐諸侯儀羣臣拜舞天顏舒  
我王何憂能不移

連一作延除叶魚羈反  
書叶商之反舒叶同書

若何歌

一作采  
葛婦歌

嘗膽不苦味若飴今我采葛以作絲

離別相去辭

吳越春秋曰越王伐吳國人各送  
其子弟於郊境之上作離別相去

之辭

蹀蹀摧長慝兮擢戟馭爰所離不降兮以泄我王氣蘇  
三軍一飛降兮所向皆殂一士判歟兮而當百夫道祐



有德兮吳卒自屠雪我王宿耻兮威振八都軍伍難更  
兮勢如貔羆行行各努力兮於乎於乎

河梁歌

吳越春秋曰越勾踐既滅吳霸諸侯號  
令於齊楚秦晉皆輔周室秦厲公不如

命勾踐乃選吳越將士西渡河以攻秦秦人  
懼自引咎越乃還軍軍人悅樂作河梁之詩  
曰

渡河梁兮渡河梁舉兵所伐攻秦王孟冬十月多雪霜  
隆寒道路誠難當陳兵未濟秦師降諸侯怖懼皆恐惶  
聲傳海內威遠邦稱伯穆桓齊楚莊天下安寧壽考長  
悲去歸兮河無梁

降胡  
江反

彈鋏歌

三章 史記孟嘗君傳馮驩見孟嘗君  
居傳舍十月孟嘗君問傳舍長曰客何



所爲答曰馮先生甚貧惟有一劍耳又蒯緱彈其劍而歌曰云云孟嘗君遷之幸舍食有魚矣五日又問傳舍長答曰客復彈劍而歌曰云云孟嘗君遷之代舍五日孟嘗君復問傳舍長答曰先生又嘗彈劍而歌曰云云于是孟嘗君不悅

田齊馮驩

長鋏歸來乎食無魚

右一

長鋏歸來乎出無車

右二

長鋏歸來乎無以爲家

右三

楊朱歌

莊子楊朱之友曰季梁疾大漸其子環而泣之請醫季梁謂楊朱曰汝奚不爲

我歌以曉之楊朱歌曰云云俄而季梁之疾自瘳

楊朱

天其弗識人胡能覺匪祐自天弗孽由人我乎汝乎其



弗知乎醫乎巫乎其知之乎

識叶施灼反

引聲歌

古今樂錄曰莊周者齊人也隱於山岳潛王遣使齎金百鎰聘以相位周謝使

者去引聲歌曰

莊周

天地之道近在胸臆呼翕精神以養九德渴不求飲饑不索食避世守道志潔如玉卿相之位難可直當巖巖之石幽而清涼枕塊寢處樂在其央寒涼回固可以久

長

王叶魚律反固一作周

祠洛水歌

一作秦始皇歌古今樂錄曰秦始皇祠洛水有黑頭公從河中出呼始皇

曰來受天之寶乃與羣臣作歌

秦始皇

洛陽之水其色蒼蒼祠祭大澤倏忽南臨洛濱醲禱色



連三光

古樂苑前卷終



古樂苑卷第一

西吳 梅鼎祚 補正

東越 呂胤昌 校閱

郊廟歌辭

樂記曰王者功成作樂治定制禮是以五帝殊時不相沿樂三王異世不相襲禮明其有損益也然自黃帝以來至於三代千有餘年而其禮樂之備可以考而知者唯周而已周昊天有成命乃郊祀天地之樂歌也清廟祀太廟之樂歌也我將祀明堂之樂歌也載芟良耜藉田社稷之樂歌也然則祭樂之有歌其來尚矣兩漢已後世有制作其所以用於郊廟朝廷以接神人之歡者其金石之響歌舞之容亦各因其功業治亂之所起而本其風俗之所由武帝時詔司馬相如等造郊祀歌詩十九章五郊互奏之又作安世歌詩十七章薦之宗廟至明帝乃分樂爲四品一曰大予樂典郊廟上



陵之樂郊樂者易所謂先王以作樂崇德殷薦上帝宗廟樂者虞書所謂琴瑟以詠祖考來格詩云肅雍和鳴先祖是聽也二曰雅頌樂典六宗社稷之樂社稷樂者詩所謂琴瑟繫鼓以御田祖禮記曰樂施於金石越於音聲用乎宗廟社稷事乎山川鬼神是也永平三年東平王蒼造光武廟登歌一章稱述功德而郊祀同用漢歌魏歌辭不見疑亦用漢辭也武帝始命杜夔創定雅樂時有鄧靜尹商善訓雅歌歌師尹胡能習宗廟郊祀之曲舞師馮肅服養曉知先代諸舞夔總領之魏復先代古樂自夔始也晉武受命百度草創泰始二年詔郊廟明堂禮樂權用魏儀遵周室肇稱殷禮之義但使傳玄改其樂章而已永嘉之亂舊典不存賀循爲太常始有登歌食舉之樂明帝太寧末又詔阮孚增益之至孝武太元之世郊祀遂不設樂宋文帝元嘉中南郊始設登歌廟舞猶闕乃詔顏延之造天地郊登歌三篇大抵依倣晉曲南齊梁陳初皆沿襲後更創制以爲一代之典元魏宇文繼有朔漢宣武已後雅好胡曲郊廟之樂徒有其名隋文平陳始獲江左舊樂乃調五音爲五夏二舞



登歌房中等十四調。賓祭用之。唐高祖受禪未遑改造樂府。尚用前世舊文。武德九年乃命祖孝孫脩定雅樂。而梁陳盡吳楚之音。周齊雜胡戎之伎。於是斟酌南北。考以古音。作為唐樂。

## 漢郊祀歌

漢書禮樂志曰。武帝定郊祀之禮。祠太一於甘泉。就乾位也。祭后土於汾陰。澤中方丘也。乃立樂府采詩。夜誦有趙代秦楚之謳。以李延年為協律都尉。多舉司馬相如等數十人。造為詩賦。畧論律呂。以合八音之調。作十九章之歌。以正月上辛用事甘泉園丘。使童男女七十人俱歌。昏祠至明。夜嘗有神光如流星。止集於祠壇。天子自竹宮而望拜。百官侍祠者數百人。皆肅然動心焉。其餘巡狩福應之事。不序郊廟。是時河間獻王獻所集雅樂。天子下太樂官。常存肄之。歲時以備數。然不常御。常御及郊廟。皆非雅聲。今漢郊廟詩歌。未有祖宗之事。八音調均。又不協于鍾律。而內有掖庭材人。外有上林樂府。皆以鄭聲施于朝廷。哀帝即位。下詔罷樂府。官郊



祭樂及古兵法武樂在經非鄭衛之樂者條奏  
別屬他官丞相孔光大司空何武奏郊祭樂六  
十二人給祠南北郊宋書樂志曰漢武頗造新  
歌然不以光揚祖考崇述正德但多詠祭祀及  
祥瑞而已今按其首練時曰曰靈之來靈之至  
迎神也帝臨五章歌五帝也泰元三章統頌天  
地而日出入言人命不能安固武帝願乘黃之  
徠下如黃帝之升而仙也其後或紀瑞應或祝  
神釐赤蛟曰禮樂成靈將歸則送神之曲也後  
代郊祀樂府多倣之大都本騷九歌招魂故其  
詞幽深峻絕

練時日

古色奇卿音靈幽氣靈光奕々紙上屈子九歌後另開面目

練時日侯有望煇煇蕭延四方九重開靈之旂垂惠恩  
鴻祐休靈之車結玄雲駕飛龍羽旄紛靈之下若風馬  
左倉龍右白虎靈之來神哉沛先以雨般商裔靈之至



慶陰陰。相放怫。震澹心。靈已坐。五音飭。虞至旦。承靈億。  
牲蘭栗。粢盛香。尊桂酒。賓八鄉。靈安留。吟青黃。徧觀此。  
眺瑤堂。衆嫔竝。綽奇麗。顏如荼。兆逐靡。被華文。則霧縠。  
曳阿錫。被珠玉。俠嘉夜。蒨蘭芳。澹容與。獻嘉觴。殷與班同。放悲音。昉弗俠。與挾同。

靈之舞以下鋪排六段而變幻錯綜不板不實倚極飛揚生動。衆嫔四句寓美人之多穠而中則招魂之遺也。

帝臨

張晏云此后土之歌也。土數五故稱數以五。坤爲母故稱媪。土色黃故稱上黃。劉敞

云帝指武帝。改服色尚黃。數用五。富媪者由漢以土德王也。按青陽四歌則后土當在中壇。張說是矣。

帝臨中壇。四方承宇。繩繩意變。備得其所。清和六合。制數以五。海內安寧。興文偃武。后土富媪。昭明三光。穆穆



優游嘉服上黃

媪一云當作媪如作媪則坤母之說鑿矣

青陽

史記樂書曰春歌青陽夏歌朱明秋歌西顥冬歌玄冥四首漢書並云鄒子樂

青陽開動根莖以遂膏潤并愛跂行畢逮霆聲發榮壑處頃聽枯槁復產廼成厥命衆庶熙熙施及夭胎羣生

堪堪惟春之祺

頃讀如傾堪音湛

四章分祭四時之神天氣時物無不畢達直是胸有造化

朱明

朱明盛長專與萬物桐生茂豫靡有所詘敷華就實既阜既昌登成甫田百鬼迪嘗廣大建祀肅雍不忘神若宥之傳世無疆

顏師古云桐讀爲通劉放云云桐幼穉也

西顥



西顥沆碣。秋氣肅殺。含秀垂穎。續舊不廢。姦偽不萌。祆孽伏息。隅辟越遠。四貉咸服。既畏茲威。惟慕純德。附而不驕。正心翊翊。

廢叶音發

續舊不廢言肅殺中有生机也

### 玄冥

玄冥陵陰。蟄蟲蓋藏。中木零落。抵冬降霜。易亂除邪。革正易俗。兆民反本。抱素懷樸。條理信義。望禮五嶽。籍斂之時。掩收嘉穀。

### 惟泰元

漢書禮樂志曰建始元年丞相匡衡奏罷龍鸞路龍鱗更定詩曰涓選休成

惟泰元尊。媼神蕃釐。經緯天地。作成四時。精建日月。星辰度理。陰陽五行。周而復始。雲風雷電。降甘露雨。百姓



蕃滋咸循厥緒。繼統共勤。順皇之德。鸞路龍鱗。罔不胥  
飭。嘉邊列陳。庶幾宴享。滅除凶災。烈騰八荒。鐘鼓竿笙。  
雲舞翔翔。招搖靈旗。九夷賓將。釐讀如僖共讀泰元天也姬神地也言天神至尊地神多福

天地

匡衡奏罷黜繡周張更定詩曰肅若舊典

天地竝況。惟予有慕。爰熙紫壇。思求厥路。恭承禋祀。緼  
豫爲紛。黻繡周張。承神至尊。千童羅舞。成八溢。合好效  
歡。虞泰一九歌畢。奏斐然殊。鳴琴竽瑟。會軒朱璆。磬金  
鼓靈。其有喜百官濟濟。各敬厥事。盛牲實俎。進聞膏神。  
奄留臨須。搖長麗。前掞光耀。明寒暑不忒。況皇章展詩。  
應律。珣玉鳴含。宮吐角激。徵清發。梁揚羽申。以商造茲。



新音永久長聲氣遠條鳳鳥鵲神夕奄虞蓋孔享溢與俗同

軒朱即朱軒鵲古翔字明章以後叶音

### 日出入

日出入安窮時世不與人同故春非我春夏非我夏秋非我秋冬非我冬泊如四海之池徧觀是耶謂何吾知所樂獨樂六龍六龍之調使我心若訾黃其何不徠下

### 天馬

漢書武帝紀曰元鼎四年秋馬生渥洼水中作天馬之歌禮樂志作元狩三年李斐

曰南陽新野有暴利長武帝時遭刈屯田嚴煌界數於渥洼水旁見羣野馬中有奇者與凡馬異來飲此水利長先作土偶持勒鞞於水傍馬玩習久之代土偶持勒鞞收得獻之欲神異之云從水中出也太初四年春貳師將軍李廣利斬大宛王首獲汗血馬來作西



極天馬之歌西域傳曰大宛國多善馬馬汗  
血言其先天馬子也應劭曰大宛有天馬種  
蹏蹋石汗血蹏石者謂蹏石而有跡言其蹏  
堅利汗血者謂汗從前肩膊出如血號一日  
千里也張騫傳曰漢武帝初發書易曰神馬  
當從西北來得烏孫馬好名曰天馬及得宛  
馬汗血益壯更名烏孫馬曰西域馬宛馬曰  
天馬云史記樂書別有二歌與此小異今載  
于後

太一況天馬下同賦霑赤汗沫流赭志倏儻精權奇籥浮雲

晻上馳體容與逝萬里今安匹龍爲友

天馬歌 籥音 躡逝音逝 古迺

字師古云 逝與厲同

天馬來從西極涉流沙九夷服天馬來出泉水虎脊兩  
化爲鬼天馬來歷無草徑千里循東道天馬來執徐時



將搖舉誰與期。天馬來開遠門。竦予身逝昆侖。天馬來  
龍之媒。游閭闔觀玉臺。

西極天馬歌 應邵云辰曰  
執徐言得天馬時歲在辰也

### 天門

天門開。詆蕩蕩。穆竝騁以臨饗。光夜燭德信著。靈寢平  
而鴻長生。豫大朱涂。廣夷石爲堂。飾玉梢以舞歌。體招  
搖若永望。星畱僉塞。墮光照紫幄。珠煩黃幡比。玃回集  
貳雙飛。常牟月穆穆以金波。日華燿以宣明。假清風軋  
忽激長至。重觴神裴徊若留放。殢冀親以肆章。函蒙祉  
福常若期。寂寥上天知。厥時汎汎溟溟。從高旂殷勤此  
路臚所求。佻正嘉吉弘以昌休。嘉殽隱溢四方。專精厲



意逝九閼紛云六幕浮大海

鉄讀如迭瑾音  
觀閼叶音改

景星

一曰寶鼎歌漢書武帝紀曰元鼎四年夏  
六月得寶鼎后土祠旁作寶鼎之歌禮樂

志曰景星元鼎五

年得鼎汾陰作

景星顯見信星彪列象載昭庭日親以察參侔開闔爰

推本紀汾睢出鼎皇祐元始五音六律依韋響昭襍變

竝會雅聲遠姚空桑琴瑟結信成四興遞代八風生殷

殷鍾石羽籥鳴河龍供鯉醇犧牲百末旨酒布蘭生泰

尊柘漿析朝醒微感心攸通修名周流常羊思所并穰

穰復正直往甯馮蠲切和疏寫平上天布施后土成穰

穰豐年四時榮

睢音誰甯  
叶音寧



齊房

一曰芝房歌。漢書武帝紀曰元封二年夏六月甘泉宮內中產芝九莖連葉作芝房

之歌故詔書曰上帝溥臨不異下房賜朕弘休是也禮樂志曰齊房元封二年芝生甘泉

齊房作古辭別有

靈芝歌一首載後

齊房產草九莖連葉宮童效異披圖按諫玄氣之精回  
復此都蔓蔓日茂芝成靈華

后皇

后皇嘉壇立玄黃服物發冀州兆蒙祉福沆沆四塞假

狄合處經營萬億咸遂厥宇

沆音亮  
假即遐

華燁燁

華燁燁固靈根神之旂過天門上千乘敦昆侖神之出



排玉房周流雜拔蘭堂神之行旌容容騎沓沓般從從  
神之徠汎翊翊甘露降慶雲集神之揄臨壇宇九疑賓  
夔龍舞神安坐鵷吉時共翊翊合所思神嘉虞申貳觴  
福沕洋邁延長沛施祐汾之阿揚金光橫泰河莽若雲  
增揚波偏臚驩騰天歌敦讀如屯

五神

五神相包四鄰土地廣揚浮雲屹嘉壇椒蘭芳璧玉精  
垂華光益億年美始興交於神若有承廣宣延咸畢觴  
靈輿位偃蹇驤卉汨臚析奚遷淫淥澤淫然歸

朝隴首

一曰白麟歌漢書武帝紀曰元狩元年冬十月行幸雍獲白麟作



朝隴首覽西垠雷電杳獲白麟爰五止顯黃德圖勾虐  
熏驚殛闢流離抑不詳賓百僚山河饗掩回轅鬻長馳  
騰雨師灑路陂流星隕感惟風籥歸雲撫懷心燎字

象載瑜

一曰赤鴈歌漢書禮樂志曰太始三年行幸東海獲赤鴈作

象載瑜白集西食甘露飲榮泉赤鴈集六紛員殊翁襍

五采文神所見施祉福登蓬萊結無極

西叶音先

赤蛟

赤蛟綏黃華益露夜零晝晦溢百君禮六龍位勺椒漿  
靈已醉靈既享錫吉祥芒芒極降嘉觴靈殷殷爛揚光  
延壽命永未央杳冥冥塞六合澤汪濊輯萬國靈禔禔



象輿轡。票然逝旗。透蛇。禮樂成靈。將歸。託玄德長無哀。

太一歌

史記樂書曰武帝得神馬渥洼水中次以爲太一之歌。後伐大宛得千里

馬馬名蒲梢。次作以爲歌。中尉汲黯進曰。凡王者作樂上以承祖宗。下以化兆民。今陛下得馬詩以爲歌。協於宗廟。先帝百姓豈能知其音邪。上默然不說。

太一貢兮天馬下。霜赤汗兮沫流赭。騁容與兮蹕萬里。今安匹兮龍與友。

蒲梢歌

天馬來兮從西極。經萬里兮歸有德。承靈威兮降外國。涉流沙兮四夷服。

靈芝歌

太平御覽作班固郊祀靈芝歌

古辭



因露寢兮產靈芝  
象三德兮瑞應圖  
延壽命兮光此都

配上帝兮象太微  
參日月兮揚光輝

瑞應一作應瑞



古樂苑卷第一

終



古樂苑卷第二

西吳 梅鼎祚 補正

東越 呂胤昌 校閱

郊廟歌辭

郊祀

宋

齊

晉郊祀歌

晉書樂志曰漢自東京大亂絕無金石之樂樂章亾缺不可復知及魏武平荊州獲漢雅樂郎河南杜夔能識舊法以爲軍謀祭酒使創定雅樂時又有散騎侍郎鄧靜尹商善訓雅樂歌師尹胡能歌宗廟郊祀之曲舞師馮肅服養曉知先代諸舞夔悉摠領之遠詳經籍近採故事考會古樂始設軒懸鐘磬而黃初中柴王左延年之徒復以新聲被寵改其聲韻及武帝受命之初百度草創泰始二年詔郊祀明堂禮樂權用魏儀遵周室肇稱殷禮之義但改樂章而已使



傳玄為之辭云宋書樂志曰晉氏泰始之初傳玄作晉郊廟歌詩三十二篇又建平王宏議宋及東晉太祝惟送神而不迎神或云廟以居神恒如在也不應有郊送之事傳玄有迎神送神歌辭明江左不迎非舊典也

天地五郊夕牲歌

傳玄

下同五篇

天命有晉穆穆明明我其夙夜祇事上靈常于時假迄用有成於薦玄牡進夕其牲崇德作樂神祇是聽有晉書作

其

迎送神歌

宣文蒸哉日靖四方永言保之夙夜匪康光天之命上帝是皇嘉樂殷薦靈祚景祥神祇降假享福無疆



饗神歌

天祚有晉其命維新受終于魏奄有兆民燕及皇天懷  
柔百神不顯遺烈之德之純享其玄牡式用肇禋神祇  
來格福祿是臻

兆晉書  
作黎

時邁其猶昊天予之祐享有晉肇民戴之畏天之威敬  
授民時丕顯丕承於猶繹思皇極斯建庶績咸熙庶幾

夙夜惟晉之祺

民晉書作庶  
民晉書作人

宣文惟后克配彼天撫寧四海保有康年於乎緝熙肆  
用靖民爰立典制爰修禮紀作民之極莫匪資始克昌  
厥後永言保之



前所作天地郊明堂夕牲歌

傳玄

下同  
五篇

皇矣有晉時邁其德受終于天光濟萬國萬國既光神  
定厥祥虔于郊祀祇事上皇祇事上皇百祿是臻巍巍  
祖考克配彼天嘉牲匪歆德馨惟饗受天之胙神和四  
暢

祿晉書作福祚晉書作祐神  
和四暢晉書作神化四方

### 降神歌

於赫大晉膺天景祥二帝邁德宣茲重光我皇受命奄  
有萬方郊祀配享禮樂孔章神祇嘉饗祖考是皇克昌  
厥後保胙無疆

### 天郊饗神歌



整泰壇祀皇神精氣感百靈賓蒞朱火燎芳薪紫煙遊  
冠青雲神之體靡象形曠無方幽以清神之來光景照  
聽無聞視無兆神之至舉歆歆靈爽協動余心神之坐  
同歡娛澤雲翔化風舒嘉樂奏文中聲八音諧神是聽  
咸潔齊竝芬芳烹牲牲享玉觴神悅饗歆禋祀祐大晉  
降繁祉昨京邑行四海保天年窮地紀

祀晉書作禮遊  
作起牲牲作牲

牲昨作作  
行作廣

### 地郊饗神歌

學記載  
首注後

整泰圻埃皇祇衆神感羣靈儀陰祀設吉禮施夜將極  
時未移祇之體無形象潛泰幽洞忽荒祇之出夢若有



靈無遠天下毋祇之來遺光景昭若存終冥冥祇之至  
舉欣欣舞象德歌成文祇之坐同歡豫澤雨施化雲布  
樂八變聲教敷物咸享祇是娛齊既潔侍者肅玉觴進  
咸穆穆享嘉蓂歆德馨昨有晉暨羣生溢九壤格天庭  
保萬壽延億齡

結方丘祗國琛樽既享俎既歆歛檢玉具鑒琛琳百福底自古錫萬壽迄在今

明堂饗神歌

經始明堂享祀匪懈於皇烈考光配上帝赫赫上帝既  
高既崇聖考是配明德顯融率土敬職萬方來祭常于  
時假保胙永世

宋郊祀歌



宋書樂志曰文帝元嘉十八年九月有司奏二  
郊宜奏登歌二十二年南郊始設登歌詔御史  
中丞顏延之造歌詩廟樂尚闕孝建二年九月  
有司奏前殿中曹郎荀萬秋議謂郊廟宜設備  
樂竟陵王誕等五十一人並同萬秋議丹陽尹  
顏竣以郊祀有樂未見明証建平王宏以萬秋  
謂郊宜有樂事有典據時衆議並同宏祠南郊  
迎神奏肆夏皇帝初登壇奏登歌初獻奏凱容  
宣烈之舞送神奏肆夏祠廟迎神奏肆夏皇帝  
入廟門奏永至皇帝請東壁奏登歌初獻奏凱  
容宣烈之舞終獻奏永  
安送神奏肆夏詔可

### 夕牲歌

顏延之 下同

寅威寶命嚴恭帝祖表海炳岱系唐胄楚靈鑒濬文民  
屬獻武奄受敷錫宅中拓宇亘地稱皇罄天作主月竈  
來賓日際奉土開元首正禮交樂舉六典聯事九官列



序有牲在滌有潔在俎以薦王衷以答神祐

表海炳岱一作炳海

代出

### 迎送神歌

維聖饗帝維孝饗親皇乎備矣有事上春禮行宗祀敬  
達郊禋金枝中樹廣樂四陳陟配在京降德在民奔精  
照夜高燎煬晨陰明浮爍沈滢深淪告成大報受釐元  
神月御按節星驅扶輪遙輿遠駕曜曜振振

饗郭本作養駕郭本

舉作

### 饗神歌

營泰時定天衷思心睿謀筮從建表絕設郊宮田燭置



燿火通曆元旬律首吉飾紫壇坎列室中星兆六宗秩  
乾宇晏地區謚大孝昭祭禮供牲日展盛自躬具陳器  
備禮容形僊綴被歌鐘望帝閣聳神蹕靈之來辰光溢  
潔粢酌娛太一明輝夜華哲日裸既始獻又終煙薌鬯  
報清穹饗宋德胙王功休命永福履克

### 明堂歌

南齊書樂志曰明堂祠五帝漢郊祀歌皆四言  
宋孝武使謝莊造辭莊依五行數木用三火用  
七土用五金用九水用六按鴻範五行一水二  
火三木四金五土月令木入火七土五金九水  
六蔡邕云東方木三土五故八南方火二土五  
故七西方金四土五故九北方水一土五故六  
又納音數一言土三言火五言水七言金九言  
木若依鴻範木數用三則應水一火二金四也



若依月令金九水六則應木八火七也當以鴻  
範一二之數言不成文故有取舍而使兩義並  
違未詳以數立  
文爲何依據

迎神歌

宋書樂志曰迎送神歌依  
漢郊祀三言四句一轉韻

謝莊

下同

地紐謐乾樞回華蓋動紫微開旌蔽日車若雲駕六氣  
乘綢緼曄帝京輝天邑聖祖降五靈集構瑤祀聳珠簾  
漢拂幌月棲檐舞綴暢鍾石融駐飛景鬱行風懋燦盛  
潔牲牲百禮肅羣司虔皇德遠大孝昌貫九幽洞三光  
神之安解玉鑾景福至萬寓歡

氣郭本作龍

登歌

舊四言詩



雍臺辨朔澤宮練辰潔火夕照明水朝陳六瑚貢室八  
羽華庭昭事先聖懷濡上靈肆夏戒敬升歌發德永固  
鴻基以綏萬國

辰郭本作服誤

歌太祖文皇帝

依周頌體齊書樂志曰周頌我將祀文王言皆四其一句五一

句七莊歌太祖亦無定句

維天爲大維聖祖是則辰居萬寓綴旒下國內靈八輔  
外光四瀛蒿宮仰益日館希旌複殿畱景重檐結風刮  
楹接緯達嚮承虹設業設簋在王庭肇禋祀克配乎靈  
我將我享維孟之春以孝以敬以立我烝民

歌青帝

三言依木數



參映夕駟照晨靈乘震司青春鴈將向桐始蕤柔風舞  
暄光遲萌動達萬品新潤無際澤無垠

歌赤帝

七言依火數

龍精初見大火中朱光北至圭景同帝在在離寔司衡  
水雨方降木槿榮庶物盛長咸殷阜恩覃四冥被九有

歌黃帝

五言依土數

履艮宅中寓司繩御四方裁化遍寒燠布政周炎涼景  
麗條可結霜明冰可折凱風扇朱辰白雲流素節分至  
乘結啓閉集恒度帝運緝萬有皇靈澄國步

御一作  
總結一

浮作



歌白帝 九言依全數

百川如鏡天地爽且明雲沖氣舉德盛在素精木葉初  
下洞庭始揚波夜光徹地翻霜照懸河庶類收成歲功  
行欲寧浹地奉渥罄宇承秋靈 秋一作帝

歌黑帝 六言依水數

歲月既宴方馳靈乘坎德司規玄雲合晦鳥路白雲繁  
亘天涯雷在地時未光飾國典閉關梁四節遍萬物殿  
福九域祚八鄉晨晷促夕漏延太陰極微陽宣鵲將巢  
冰已解氣濡水風動泉 鳥一作歸雲一作雪

送神歌 依漢郊祀送神亦三言卽赤蛟也



蘊禮容餘樂度靈方留景欲暮開九重肅五達鳳參差  
龍已沫雲旣動河旣梁萬里照四空香神之車歸清都  
璇庭寂玉殿虛睿化凝孝風熾顧靈心結皇思

### 齊南郊樂歌辭

南齊書樂志曰武帝建元二年有司奏郊廟雅  
樂歌辭舊使學士博士撰搜簡採用請勅外凡  
義學者普令製立參議太廟登歌宜用司徒褚  
淵餘悉用黃門郎謝超宗辭超宗所撰多刪顏  
延之謝莊辭以爲新曲備改樂名永明二年太  
子步兵校尉伏曼容上表宜集英儒刪纂雅樂  
詔付外詳竟不行永明二年又詔王儉造太廟  
二室及郊配辭隋書樂志曰梁天監初北中郎  
司馬何佟之上言按周禮王出入則奏王夏尸  
出入則奏肆夏牲出入則奏昭夏今樂府之夏  
唯變王夏爲皇夏蓋緣秦漢已來稱皇故也而  
齊氏仍宋儀注迎神奏昭夏皇帝出入奏永至



牲出入更奏引牲之樂其為舛謬莫斯之甚又  
曰陳文帝天嘉五年詔尚書左丞劉平儀曹郎  
張崔定南北郊及明堂儀注改  
所用齊樂以韶為名餘詳志中

肅咸樂

羣臣出入奏

謝超宗

下同

寅承寶命嚴恭帝緒奄受敷錫升中拓宇亘地稱皇肇  
天作主月域來賓日際奉土開元首正禮交樂舉六典

聯事九官列序

顏延之夕牲歌刪定此下除四句皆顏辭

引牲樂

牲出入奏

皇乎敬矣恭事上靈昭教國祀肅肅明明有牲在滌有  
潔在俎以薦王衷以答神祐陟配在京降德在民奔精  
望夜高燎佇晨

顏延之夕牲歌合迎送神歌刪定



嘉慶樂

薦豆呈毛血奏

我恭我享惟孟之春以孝以敬立我烝民青壇奄靄翠  
幙端凝嘉俎重薦兼籍再升設業設簋展容玉庭肇禋  
配祀克對上霽

謝莊歌太祖辭增損  
右夕牲歌並重奏

昭夏樂

迎神奏

惟聖饗帝惟孝饗親禮行宗祀敬達郊禋金枝中樹廣  
樂四陳月御案節星驅扶輪遙輿遠駕曜曜振振告成

大報受釐元神

延之迎送  
神歌刪定

永至樂

皇帝入壇東門奏

紫壇望靈翠幙佇神率天奉贄罄地來賓神貺並介泯



祇合社恭昭鑒享肅光孝祀威藹四靈洞曜三光皇德  
全被大禮流昌

登歌

皇帝升壇奏

報惟事天祭實尊靈史正嘉兆神宅崇禎五時昭鬯六  
宗彛序介丘望塵皇軒肅舉

文德宣烈樂

皇帝初獻奏

營泰時定天衷思心緒謀筮從田燭置燿火通大孝昭

國禮融

延之饗神  
歌刪定

武德宣烈樂

次奏

功燭上宙德耀中天風移九域禮飾八埏四靈晨炳五



緯宵明膺曆締運道茂前聲

高德宣烈樂

太祖高皇帝配饗奏此章永明二年造尚書令王儉辭

王儉

饗帝嚴親則天光大  
鳥奕前古榮鏡無外  
日月宣華卿雲流  
靄五漢同休六幽咸泰

嘉胙樂

皇帝飲福酒奏

謝超宗

邕嘉禮承休錫成德符景緯  
昌華應帝策聖藹耀昌基  
融祉暉世曆聲正涵月軌  
書文騰日迹寶瑞昭神圖  
靈貺流瑞液我皇崇暉祚  
重芬冠往籍

騰一作同

昭夏樂

送神奏



薦饗洽禮樂該神娛展辰旆回洞雲路拂璇階紫雰靄  
青霄開睠皇都顧玉臺留昌德結聖懷

昭遠樂

皇帝就燎位奏

天以德降帝以禮報往尊俯陳柴幣仰燎事展司采敬  
達瑄鄉烟贄青昊震颺紫場陳馨示策肅志宗禋禮非  
物備福唯誠陳

休成樂

皇帝還便殿奏

昭事上祀饗薦具陳迴鑾轉翠拂景翔宸綴縣敷暢鍾  
石昭融羽炫深畧籥暄行風肆序輟度肅禮停文四金  
聳衛六馭齊輪



附

江淹造三章正史及本集郭氏樂府並不載按齊永明初嘗詔淹造籍田歌且齊郊祀有宣烈之樂梁樂無是詩紀云未詳所用今按辭中薦通蒼祇殷崇配天之語爲南郊近是

牲出入歌辭

並見初學記

江淹

下同

祝詳史具禮備樂薦有牲在陳有鼓在縣騰燭象星奔  
水類電郊燎夙戒駸彼蔡駟以伺質明以伸神宴

薦豆呈毛血歌辭

時恭時祀有物有則伊我上聖實抱明德犧象交陳鬱  
樽四塞黍惟嘉穀酒惟玄默薦通蒼祇慶覃黎黑願靈  
之降祚家祐國



# 奏宣烈之樂歌辭

殷崇配天周尊明祀瑞合汾陰慶同泰時青幕雲舒丹  
殿霞起二曜惟新五精告始于以饗之景福是履

## 北郊樂歌

南齊書樂志曰按周頌昊天有成命郊祀天地  
也是則周漢以來祭天地皆同辭矣宋顏延之  
饗地神辭一篇餘與南郊同齊北郊羣臣入奏  
肅咸牲入奏引牲薦豆呈毛血奏嘉薦皇帝入  
壇東門奏永至飲福酒奏嘉胙還便殿奏休成  
辭並與南郊同迎送神昭夏登歌異隋書樂志  
曰陳初武帝詔求宋齊故事太常卿周弘讓奏  
曰齊氏承宋咸用元徽舊式宗祀朝饗奏樂俱  
同唯北郊之禮頗有增益皇帝入壇門奏永至  
飲福酒奏嘉胙太尉亞獻奏凱容埋牲奏隸幽  
帝還便殿奏休成衆官並出奏肅成此乃元徽  
所闕永明六年之所加也唯送神之樂宋孝建



二年起居注云奏肆夏永明中改奏昭夏帝遂依之

昭夏樂

迎地神奏

謝超宗

下同

詔禮崇營敬饗玄時靈正丹帷月肅紫墀展薦登華風  
縣凝鏘神惟戾止鬱葆遙莊昭望歲分環游辰太穆哉  
尚禮橫光秉藹

登歌

皇帝升壇奏

佇靈敬享禋肅彞文縣動聲儀薦潔牲芬陰祗以貺昭  
祀式慶九服熙度六農祥正

地德凱容歌

初獻

繕方丘端國陰掩珪畧仰靈心詔源委遍丘林禮獻物



樂薦音

顏延之  
辭刪定

昭德凱容樂

皇帝次奏

慶圖濬邈蘊祥祕瑤倪天炳日嬪光紫霄邦化靈懋閭  
則風調儷德方儀徽載以昭

昭夏樂

送神奏

薦神升享序赫淹王俎停金奏寶旆轉旒駕旋溢素景  
鬱紫躔靈心顧留宸睠洽外瀛瑞中縣

隸幽樂

座埋奏

后皇嘉慶定祗玄時承帝休圖祗敷靈祉篚纂周序軒  
朱凝會牲幣芬壇精明佇益調川瑞昌警嶽祥泰



# 明堂樂歌

南齊書樂志曰武帝建元初詔黃門郎謝超宗造明堂夕牲等歌并採用莊辭並建元永明中奏其凱容宣烈樂嘉胙樂太廟同用

肅咸樂

賓出入奏二首

謝超宗

下同

爰承孝典恭事嚴聖浹天奉賁罄壤齊慶司儀具序羽  
容夙章芬枝揚烈黼構周張助寶奠軒酌珍充庭璆縣  
凝會琇朱竚聲先期選禮肅若有承祇對靈祉皇慶昭  
膺

尊事威儀輝容昭序迅恭明神潔盛牲俎肅肅嚴宮藹  
藹崇基皇靈降止百祇具司戒成望夜端烈承朝依微



昭旦物色輕宵

並宋殷淡章聖廟肅咸樂未除四句南齊書未注明

引牲樂

牲出入

惟誠潔饗惟孝尊靈敬芳黍稷敬滌犧牲騂繭在豢載

溢載豐以承宗祀以肅皇衷蕭芳四舉華火周傳神鑒

孔昭嘉足參牲

宋殷淡章聖廟引神樂

嘉薦樂

薦豆呈毛血奏二首

肇禋戒祀禮容咸舉六典飾文九司炤序牲柔既昭犧  
剛既陳恭滌惟清敬事惟神加籩再御兼俎重薦節動  
軒越聲流金縣

奕奕闕幄疊疊嚴闈潔誠夕鑒端服晨暉聖靈戾止翊



我皇則上綏四寓下洋萬國永言孝饗孝饗有容儉僚

贊列肅肅雍雍

並宋殷淡章  
聖廟嘉薦樂

昭夏樂

迎神奏

地紐謐乾樞回華蓋動紫微開旌蔽日車若雲駕六龍  
祭煙煴燁帝景耀天邑聖祖降五雲集懋粢盛潔牲牷  
百禮肅羣司虔皇德遠大孝昌貫九幽洞三炁神之安

解玉鑾景福至萬寓歡

刪謝  
莊辭

登歌

皇帝升明堂奏

雍臺辨朔澤宮選辰潔火夕炤明水朝陳六瑚賁室八  
羽華庭昭事先聖懷濡上靈肆夏式敬升歌發德永固



洪基以綏萬國

並謝  
莊辭

凱容宣烈樂

初獻奏

醴醴具登嘉俎咸薦饗洽誠陳禮周樂徧祝辭罷裸序  
容輟縣蹕動端庭鑾回嚴殿神儀駐景華漢亭虛八靈  
案衛三祗解途翠蓋耀澄畢霽凝晨玉鑣息節金輅懷  
音式誠達孝底心肅感追憑皇鑒思承淵範神錫懋祉  
四緯昭明仰福帝徽俯齊庶生

殷淡辭式  
一作戒

青帝歌

參映夕駟昭晨靈稌震司青春鴈將向桐始蕤和風舞  
暄光遲萌動達萬品親潤無際澤無垠

謝莊辭改  
柔爲和



赤帝歌

龍精初見大火中朱炎北至圭景同帝在在離寔司衡  
雨水方降木槿榮庶物盛長咸殷阜恩澤四溟被九有

謝莊辭改  
恩厚四句

黃帝歌

履艮宅中宇司繩總四方裁化徧寒燠布政司炎涼至  
分樂經畧閉啓集恒度帝暉緝萬有皇靈澄國步

謝莊  
辭刪

中四  
句

白帝歌

百川若鏡天地爽且明雲沖氣舉盛德在素精庶類收



成歲功行欲寧浹地奉渥罄宇承帝靈

謝莊辭刪中四句

### 黑帝歌

歲既暮日方馳靈藥坎德司規玄雲合晦鳥蹊白雪繁

亘天涯晨晷促夕漏延太陰極微陽宣

刪謝莊辭

### 嘉胙樂

還東壁受福酒奏大席同用

禮薦洽福胙昌聖皇膺嘉祐帝業凝休祥居極樂景運宅德瑞中王澄明臨四奧精華延八鄉洞海同聲懣澈宇麗乾光靈慶纏世祉鴻烈永無疆

### 昭夏樂

送神奏

蘊禮容餘樂度靈方留景欲暮開九重肅五達鳳參差



龍已沫雲旣動河旣梁萬里照四空香神之車歸青都  
璇庭寂玉殿虛鴻化凝孝風熾顧靈心結皇思鴻慶遐  
邕嘉薦令芳翊帝明德永祚深光

謝莊辭末增四句

### 雩祭樂歌

南齊書樂志曰建武二年雩祭明堂謝朓造辭一依謝莊唯世祖四言

### 迎神歌

依漢郊祀歌三言宋明堂迎神八解

謝朓

下同

清明暢禮樂新候龍景練貞辰

一解

陽律亢陰晷伏耕下

土荐穰穰

二解

宸儀警王度乾嗟雲漢望昊天

三解

張盛樂

奏雲儻集五精延帝祖

四解

雩有諷縈有秩膏鬯芬圭瓚

誌

五解

靈之來帝闔開車煜燿吹徘徊

六解

停龍轡徧觀此



凍雨飛祥雲靡

七解

壇可臨奠可歆對眚祉鑒皇心

八解

歌世祖武皇帝

依廟次四言以下各分解

濬哲維祖長發其武帝出自震重光御寓七德攸宣九  
疇咸叙靜難荆衡凝威蠡浦昧旦丕承夕惕刑政化壹  
車書德馨粲盛昭星夜景非雲曉慶衢室成陰璧水如  
鏡禮充玉帛樂被匏絃於鑠在詠陟配于天自宮徂兆  
靡愛牲牷我將我享永祚豐年

衡一作舒  
匏一作管

歌青帝

木生數三

營翼日鳥殷宵凝冰泮玄蟄昭景陽陽風習習女夷歌  
東皇集奠春酒秉青圭命田祖渥羣黎



歌赤帝

火成數七

惟此夏德德恢台兩龍在御炎精來火景方中南譎秩  
靡草云黃含桃實族雲翳鬱溫風扇興雨祁祁黍苗徧

歌黃帝

土成數五

稟火自高明毓金挺剛克涼燠資成化羣芳載厚德陽  
季勾萌達炎徂溽暑融商暮百工止歲極凌陰冲泉流  
疏已清原隰甸已平咸言祚惟億敦民保高京

歌白帝

金成數九

帝說于兌執矩固司藏百川收潦精景應徂商嘉樹離  
披榆關命賓鳥夜月如霜秋風方嫋嫋商陰肅殺萬寶



咸已適勞哉望歲場功冀可收

祖商集作金方秋作金

歌黑帝

水成數六

白日短玄夜深招搖轉移太陰霜鐘鳴冥陵起星回天  
月窮絕聽嚴風來不息望玄雲黝無色曾冰列積羽幽  
飛雪至天山側關梁閉方不巡合國吹饗蜡賓統微陽  
究終始百禮洽萬祚臻

送神歌

三言

敬如在禮將周神之駕不少留躡龍鑣轉金蓋紛上馳  
雲之外警七曜詔八神排閭闔渡天津有渰興膚寸積  
雨冥冥又終夕俾棲糧維萬箱皇情暢景命昌



籍田樂歌

南齊書樂志曰漢章帝元和元年玄武司馬班固奏用商頌載芟祠先農晉傅玄作祀先農先蠶夕牲歌詩一篇八句迎送神一篇饗社稷先農先聖先蠶歌詩三篇前一篇十二句中一篇十六句後一篇十二句辭皆叙田農事胡道安先農饗神詩一篇並八句樂府相傳舊歌三章永明四年籍田詔驍騎將軍江淹造籍田歌淹製二章不依胡傳世祖口勅付太樂歌之

祀先農迎送神升歌

江淹

下同

羽鑾從動金駕時遊教騰義鏡樂綴禮修率先丹耦躬  
遵綠疇靈之聖之歲殷澤柔

饗神歌

瓊竿旣飾繡簋以陳方燮嘉種永毓宵民



古樂苑卷第三

西吳 梅鼎祚 補正

東越 呂胤昌 校閱

郊廟歌辭

梁郊祀

北齊

北周

隋

梁雅樂歌

隋書樂志曰梁初郊禋宗廟及三朝之樂竝用宋齊元徽永明儀注唯改嘉祚為永祚又去永至之樂何佟之周捨議按周禮王出入奏王夏大祭祀與朝會同而漢制皇帝在廟奏永至朝會別奏皇夏二樂有異於禮為乖乃除永至還用皇夏及武帝定國樂並以雅為稱取詩序云言天下之事形四方之風謂之雅雅止乎十二則天數也乃至階步之樂增徽食之雅焉其辭竝沈約所製普通中薦疏之後改諸雅歌勅蕭子雲製辭既無牲牢遂省滌雅牲雅云南史曰



梁初郊廟未革牲牷樂辭皆沈約撰至是承用  
 子雲啓宜改之敕答曰此是主者守株宜急改  
 也仍使子雲撰定敕曰郊廟歌辭應須典誥大  
 語不得雜用子史文章淺言而沈約所撰亦多  
 舛謬于雲作成勅並施用隋書樂志曰梁天監  
 初時議又以爲周禮云若樂六變天神皆降神  
 居上玄去還悅忽降則自至迎則無所可改迎  
 爲降而送依前式又周禮云若樂八變則地祇  
 皆出可得而禮地宜  
 依舊爲迎神從之

皇雅

三曲五言皇帝出入奏隋書樂志曰宋孝  
 建起居注奏永至至是改爲皇雅取詩皇

矣上帝臨下有赫  
 也二郊太廟同用

沈約

下同  
 十一首

帝德實廣運車書靡不賓執琚朝羣后垂旒御百神八

荒重譯至萬國婉來親

華蓋拂紫微勾陳繞太一容裔被緹組參差羅罕畢星



回昭以爛天行徐且謚

清蹕朝萬寓端冕臨正陽青紉黃金纁袞衣文繡裳既散華蟲采復流日月光

滌雅

一曲四言牲出入宋元徽儀注奏引牲至是改爲滌雅取禮記帝牛必在滌三月也

二郊明堂太廟同用

將修盛禮其儀孔熾有膋斯牲國門是置不黎不瘠靡訾靡忌呈肌獻體永言昭事俯休皇德仰綏靈志百福具膺嘉祥允洎駿奔伊在慶覃遐嗣

牲雅

一曲四言薦毛血宋元徽三年儀注奏嘉薦至是改爲牲雅取春秋左氏傳牲牲肥

膋也二郊明堂太廟同用



反本興敬復古昭誠禮容宿設祀事孔明華俎待獻崇  
碑麗牲充哉繭握肅矣簪纓其贊既啓我豆既盈庖丁  
遊刃葛盧驗聲多祉攸集景福來并

誠雅

一曲三言南郊降神用宋元徽儀注奏昭夏至是改爲誠雅取尚書至誠感神也

懷忽慌瞻浩蕩盡誠潔致虔想出杳冥降無象皇情肅  
具僚仰人禮盛神途敬優明靈申敬享感蒼極洞玄象

誠雅

一曲三言北郊迎神用

地德溥崑丘峻揚羽翟鼓應輦出尊祗展誠信招海瀆  
羅嶽鎮惟福祉咸昭晉

誠雅

一曲四言南北郊明堂太廟送神同用



我有明德馨非稷黍牲玉孔備嘉薦惟旅金懸宿設和  
樂具舉禮達幽明敬行尊俎鼓鐘云送遐福是與

獻雅

一曲四言皇帝飲福酒宋元徽儀注奏嘉祚梁初改爲永祚至是改爲獻雅取禮記

祭統尸飲五洗玉爵獻卿今之福酒亦古獻之義也二郊明堂同用

神宮肅肅天儀穆穆禮獻既同膺茲釐福我有馨明無

愧史祝

禮雅

一曲四言就燎位用宋元徽儀注奏昭遠就埋位齊永明儀注奏隸幽至是燎埋俱

奏禮雅取周禮大宗伯以禮祀祀昊天上帝也

紫宮昭煥太一微玄降臨下土尊高上天載陳珪幣式  
備牲牲雲菰清引枸簋高懸俯昭象物仰致高煙肅彼



靈祉咸達皇虔

禋雅

一曲四言  
就埋用

盛樂斯舉協徵調宮靈饗慶洽祉積化融八變有序三  
獻已終坎牲塵玉酬德報功振垂成呂授壤生風道無  
虛致事由感通於皇盛烈比祚華嵩

二郊登歌

隋書樂志曰大戴云清廟之歌懸一磬而尚搏拊在漢之世獨有登歌近代已來始用絲竹舊三朝設樂皆有登歌梁武以爲登歌者頌祖宗功業非元日所奏於是去之後以其說非通復用於嘉慶梁二郊宗廟皇帝初獻及明堂編歌五帝德並奏登歌又曰南郊舞奏黃鍾取陽始化也北郊舞奏林鍾取陰始化也明堂宗廟所尚者■蕤賓是爲敬之名復有陰主之義故同



奏焉其南北郊明堂  
宗廟之禮加有登歌

南郊登歌

二曲三言皇  
帝初獻奏

沈約

噉旣明禮告成惟聖祖主上靈爵已獻壘又盈息羽籥  
展歌聲僂如在結皇情  
禮容盛尊俎列玄酒陳陶匏設獻清旨致虔潔王旣升  
樂已闋降蒼昊垂芳烈

北郊登歌

二曲四言皇  
帝初獻奏

沈約

方壇旣埴地祇已出盛典弗訾羣望咸秩乃升乃獻敬  
成禮卒靈降無兆神饗載謐允矣嘉祚其升如日  
至哉坤元實惟厚載躬茲奠饗誠交顯晦或升或降搖



珠動佩德表成物慶流皇代純嘏不謬祺福是賚

成物郭作

萬物

明堂登歌

五曲四言

隋書樂志曰梁天監初明堂設樂大畧與南郊不殊惟壇堂異名而無就燎之位明堂則徧歌五帝其餘同於郊式焉

歌青帝

沈約

下同

帝居在震龍德司春開元布澤含和尚仁羣居既散歲云陽止飭農分地民粒惟始雕梁繡拱丹楹玉墀靈威以降百福來綏

民隋書作人

歌赤帝



炎光在離火爲威德執禮昭訓持衡受則靡草旣凋溫  
風以至嘉薦惟旅時羞孔備齊緹在堂笙鏞在下匪惟  
七百無絕終始

歌黃帝

鬱彼中壇含靈闡化廻環氣象輪無輟駕布德焉在四  
序將收音宮數五飯稷騶駟宅屏居中旁臨外宇升爲  
帝尊降爲神主

歌白帝

神在秋方帝居西皓允茲金德裁成萬寶鴻來雀化參  
見火斜幕無玄鳥菊有黃華載列笙磬式陳彛俎靈罔



常懷惟德是與

歌黑帝

德盛乎水玄冥紀節陰降陽騰氣凝象闕司智蒞坎駕  
鐵衣玄祁寒折地晷度廻天悠悠四海駿奔奉職祚我  
無疆永隆民極

闕隋書作閉  
民隋書作人

北齊大禘圜丘歌

隋書樂志曰齊武成時始定四郊宗廟三朝之  
樂大禘圜丘及北郊並同祀感帝用圜丘樂

肆夏樂

夕牲羣臣  
入門奏

陸卬等奉詔撰

肇應靈序奄宇黎民乃朝萬國爰徵百神祗展方望幽  
顯咸臻禮崇聲協贊列珪陳翼差鱗次端笏垂紳來趨



動色式贊天人

民隋書作人笏郭作拱

高明樂

迎神奏登歌辭同

惟神鑒矣皇靈肅止圓壁展事成文卽始士備八能樂  
合六變風湊伊雅光華襲薦宸衛騰景靈駕霏煙嚴壇  
生白綺席凝玄

昭夏樂

牲出入竝奏

剛柔設位惟皇配之言肅其禮念暢在茲飭牲舉獸載  
歌且舞旣設伊脂致精靈府物色惟典齋沐加恭宗族  
咸暨罔不率從

昭夏樂

薦毛血奏



展禮上月肅事應時繭粟爲用交暢有期弓矢斯發  
簪將事圓神致祀率由先志和以鑾刀臭以血膋至哉  
敬矣厥義孔高

羣臣出進熟羣臣入並奏肆夏辭同初入

皇夏樂

初入進熟皇  
帝入門奏

帝敬昭宣皇誠肅致玉帛齊軌屏攝咸次三垓上列四  
陛旁升龍陳萬騎鳳動千乘神儀天藹晬容離曜金根  
停軫奉光先導

皇夏樂

皇帝升丘奏壇  
上登歌辭同

紫壇雲暖紺幄霞褰我其陟止載致其虔百靈竦聽萬  
國咸仰人神咫尺玄應盼饗



高明樂

皇帝初獻奏

上下眷旁午從爵以質獻以恭咸斯暢樂惟雍孝敬闡臨萬邦

高明樂

皇帝奠爵訖奏高明樂覆幬之舞辭

自天子之會昌神道丘陵肅事克光天保九關洞開百靈環列八尊呈備五聲投節

武德樂

皇帝獻太祖配饗神座奏武德之樂昭烈之舞辭

配神登聖主極尊靈敬宣昭燭咸達宵冥禮弘化定樂贊功成穰穰介福下被羣生

皇帝小退當昊天上帝靈座前奏皇夏

皇夏樂

皇帝飲福酒奏



皇心緬且感吉蠲奉至誠赫哉光盛德乾以詔百靈報  
福歸昌運承祐播休明風雲馳九域龍蛟躍四溟浮慕  
呈光氣儷象燭華精漢武方知耻韶夏僅同聲

皇帝詣東陛還

便座又奏皇夏辭同初入

高明樂

送神降丘南陛奏

獻享畢懸佾周神之駕將上遊超斗極絕河流懷萬國  
寧九州欣帝道心顧留帟上下荷皇休

皇帝之望燎位奏皇夏辭同上

昭夏樂

紫壇既燎奏

玄黃覆載元首照臨合德致禮有契其心敬申事闋潔  
誠云報玉帛載升棧樸斯燎寥廓幽曖播以馨香皇靈



惟監降福無疆

皇帝自望燎位還本  
位奏皇夏辭同上

云一作共

皇夏樂

皇帝還便殿奏

天大親嚴匪敬伊孝永言肆饗宸明增耀陽丘既暢大  
典逾光乃安斯息欽若舊章天迴地旋鳴鑾引警且萬  
且億皇曆惟永

羣臣出奏肆  
夏辭同上

北郊樂歌

八首

隋書樂志曰齊北郊迎神奏高明樂登歌辭同  
薦毛血奏昭夏進熟皇帝入門及升丘竝奏皇  
夏奠爵訖奏高明樂覆燾舞送神降丘南陛奏  
高明樂既座奏昭夏還便殿奏皇夏餘竝同南  
郊按隋書南北樂合載其文異  
者即注句下今從郭本分列

高明樂



惟祇監矣皇靈肅止方琮展事卽陰成理士備八能樂  
合八變風湊伊雅光華襲薦象衛騰景靈駕霏煙嚴壇  
生白綺席凝玄

昭夏樂

展禮上月肅事應時繭栗爲用交暢有期弓矢斯發  
簋將事方祇致祀率由先志和以鑾刀臭以血膋至哉  
敬矣厥義孔高

皇夏樂

帝敬昭宣皇誠肅致玉帛齊軌屏攝咸次重垓上列分  
陞旁升龍陳萬騎鳳動千乘神儀天謁粹容離曜金根



停軫奉光先導

皇夏樂

層壇雲暖嚴幄霞褰我其陟止載致其虔百靈竦聽萬國咸仰人神咫尺玄應盼嚮

高明樂

自天子之會昌神道方澤祇事克光天保九關洞開百靈環列八尊呈備五聲投節

高明樂

獻享畢懸佾周神之駕將下遊超荒極懸崑丘懷萬國寧九州欣帝道心顧留帟上下荷皇休



樂府卷三  
昭夏樂

玄黃覆載元首照臨合德致禮有契其心敬申事闋潔  
誠云報牲玉載陳棫樸斯燎寥廓幽曖播以馨香皇靈  
惟鑒降福無疆

皇夏樂

天大親嚴匪敬伊孝永言肆饗宸明增耀陰澤云暢大  
典逾光乃安斯息欽若舊章天廻地旋鳴鑾引警且萬  
且億皇曆惟永

五郊樂歌

隋書樂志曰齊五郊迎氣降神竝奏高明樂又  
禮五方上帝竝奏高明之樂爲覆燾之舞按此



五歌亦如宋明  
莊用五行數

青帝高明樂

三言

以下詩彙  
作祖珽撰

歲云獻谷風歸斗東  
拍鴈北飛電鞭激雷車遽  
虹旌靡青龍馭和氣洽具物滋  
翻降止應帝期

赤帝高明樂

七言

嫫女司旦中呂宣朱精御節離景延根  
茲俊茂溫風發柘火風水應炎月執衡  
長物德孔昭赤旂霞曳會今朝

霞郭本作電

黃帝高明樂

五言

居中帀五運乘衡畢四時含養滋羣物  
協德固皇基暉



緩契王風持載符君德良辰動靈駕承祀昌邦國

白帝高明樂

九言

風涼露降馳景颺寒精山川搖落平秩在西成蓋藏成  
積烝民被嘉祉從享來儀鴻休溢千祀

民隋書  
作人

黑帝高明樂

六言

虹藏雉化告寒氷壯地坼年殫日次月紀方極九州萬  
邦獻力叶光是紀歲窮微陽潛兆方融天子赫赫明聖  
享神降福惟敬

祠五帝於明堂樂歌辭

肆夏樂

先一日夕牲羣臣入門奏羣臣出  
奏進熟羣臣入並奏肆夏辭同



以下詩彙  
作祖筵撰

國陽崇祀嚴恭有聞荒華胥暨樂我大君冕瑞有列禽  
帛恭叙羣后師師威儀容與執禮辨物司樂考章率由  
靡隆休有烈光

恭叙一作載叙

高明樂

太祝令迎神奏高明樂覆燾舞辭

祖德光國圖昌祇上帝禮四方闢紫宮動華闕龍虎奮  
風雲發飛朱雀從玄武攜日月帶雷雨耀宇內溢區中  
眷帝道感皇風帝道康皇風扇染盛列椒醕薦神且寧  
會五精歸福祿幸閭亭

虎隋書作獸

武德樂

太祖配饗奏武德樂昭烈舞辭五方天帝奏高明之樂覆幬之舞辭同迎氣



我惟我祖自天之命道被歸仁時屯啓聖運鍾千祀授  
手萬姓夷堯掩虐匡顏翼正載經載營庶士咸寧九功  
以洽七德兼盈丹書入告玄玉來呈露甘泉白雲郁河  
清聲教咸往舟車畢會仁加有形化浹無外嚴親惟重  
陟配惟大旣祐斯歌率土攸賴

昭夏樂

牲出入奏

孝享不匱精潔臨年滌牢委溢形色博牲于以用之言  
承歆祀肅肅威儀敢不敬止載飭載省惟牛惟羊明神  
有察保茲萬方

昭夏樂

薦毛血奏



我將宗祀夤獻厥誠鞠躬如在側聽無聲薦色斯純呈  
氣斯臭有滌有濯惟神其祐五方來格一人多祉明德  
惟馨於穆不已

皇夏樂

進熟皇帝入門奏皇帝升壇奏皇夏辭同

象乾上構儀坤下基集靈崇祖永言孝思室陳簋豆庭  
羅懸佾夙夜畏威保茲貞吉舞貴其夜歌重其升降斯  
百祿惟饗惟應

高明樂

皇帝初獻奏高明樂覆燾舞辭

度几筵闢牖戶禮上帝感皇祖酌惟潔滌以清薦心款  
達神明



高明樂

皇帝裸獻奏高  
明樂覆燾舞辭

帝精來降應我明德禮殫義展流祉邦國既受多祉實  
資孝敬祀謁其誠荷天休命

皇夏樂

皇帝飲福酒奏

恭祀洽盛禮宣英猷爛層景廣澤同深泉上靈鐘百福  
羣神歸萬年月軌咸梯岫日域盡浮川瑞鳥飛玄扈潛  
鱗躍翠漣皇家膺寶曆兩地復參天

高明樂

太祝送神奏高  
明樂覆燾舞辭

青陽奏發朱明歌西皓唱玄冥大禮肇廣樂成神心懌  
將遠征飾龍駕矯鳳旂指闔闔懸層城出溫谷邁炎庭



跨西汜過北溟忽萬億耀光精比電驚與雷行嗟皇  
懷萬靈固王業震天聲

皇夏樂

皇帝還便殿奏

文物備矣聲明有章登薦惟肅禮邇前王  
旋告罄穆穆旒冕蘊誠畢敬屯衛按部鑾蹕廻途暫留  
紫殿將及清都

### 周祀圓丘歌

隋書樂志曰周太祖迎魏武入關樂聲皆闕恭  
帝元年平荊州大獲梁氏樂器以屬有司及閔  
帝受禪居位日淺明帝踐阼雖革魏氏之樂而  
未臻雅正天和元年武帝初造山雲舞以備六  
代南北郊雩壇太廟禘祫俱用六舞建德二年  
十月甲辰六代樂成奏於崇信殿於是正定雅



音爲郊廟樂創造鍾律頗得其宜宣  
帝嗣位郊廟皆循用之無所改作

昭夏

降神奏

庾信

下同

重陽禋祀大報天丙午封壇肅且圜孤竹之管雲和弦  
神光未下風蕭然王城七里通天臺紫微斜照影徘徊  
連珠合璧重光來天策暫轉鉤陳開

丙隋書作景  
未郭本作來

皇夏

皇帝將入門奏

旌迴外壝蹕靜郊門千乘按轡萬騎雲屯藉茅無咎掃  
地惟尊揖讓展禮衡璜節步星漢就列風雲相顧取法  
於天降其永祚

昭夏

俎入奏



日至大禮豐犧上辰牲牢脩牧繭栗毛純俎豆斯立陶  
匏以陳大報反命居陽兆日六變鼓鍾三和琴瑟俎奇  
豆偶惟誠惟質

昭夏

奠玉帛奏

圓玉已奠蒼幣斯陳瑞形成象璧氣含春禮從天數智  
總圓神爲祈爲祀至敬咸遵

皇夏

皇帝升壇奏

七星是仰八陛有憑就陽之位如日之升思虔肅肅施  
敬繩繩祝史陳信玄象斯格惟類之典惟靈之澤幽顯  
對揚人神咫尺

星郭本作里  
施郭本作致



雲門舞

皇帝初獻奏

獻以誠鬱以清山壘舉沈齊傾惟尚饗洽皇情降景福  
通神明

雲門舞

皇帝初獻配帝奏

長丘遠歷大電遙源弓藏高隴鼎沒寒門人生于祖物  
本於天尊神配德迄用康年

尊郭本作奠

登歌

皇帝初獻及獻配帝畢奏

歲之祥國之陽蒼靈敬翠雲長象爲飾龍爲章乘長日  
坏蟄戶列雲漢迎風雨六呂歌雲門舞省滌濯奠牲牷

鬱金酒鳳凰尊廻天睠顧中原

列一作烈



皇夏 皇帝飲福酒奏

國命在禮君命在天陳誠惟肅飲福惟虔洽斯百禮福  
以千年鉤陳掩映天駟徘徊彫禾飭筆翠羽承疊受斯  
茂祉從天之來

雍樂 撤奠奏

禮將畢樂將闌迴日轡動天關翠鳳搖和鑾響五雲飛  
三步上風爲馭雷爲車無轍迹有煙霞暢皇情休靈命  
雨留甘雲餘慶

皇夏 帝就望燎位奏

六典聯事九司咸則率由舊章於焉允塞掌禮移次燔



卷三  
柴在焉煙升玉帛氣歛牲牲休氣馨香膋芳昭晰翼翼  
虔心明明上徹

皇夏

帝還便座奏

玉帛禮畢人神事分嚴承乃瞻瞻仰迴雲輦路千門王  
城九軌式道移候司方迴指得一惟清於萬斯寧受茲  
景命于天告成

祀方澤歌

昭夏

降神奏

庾信

下同

報功陰澤展禮玄郊平琮鎮瑞方鼎升庖調歌絲竹縮  
酒江茅聲舒鍾鼓器質陶匏列燿秀華凝芳都荔川澤



茂祉丘陵容衛雲飾山壘蘭浮汎齊日至之禮歆茲大祭

昭夏

奠玉帛奏

曰若厚載欽明方澤敢以敬恭陳之玉帛德包含養功藏靈迹斯箱既千子孫則百

登歌

初獻奏舞辭同圜丘

質明孝敬求陰順陽壇有四陛琮爲八方牲牲蕩滌蕭合馨香和鑾戾止振鷺來翔威儀簡簡鍾鼓嚶嚶聲和孤竹韻入空桑封中雲氣坎上神光下元之主功深益

藏

爲郭本作分



皇夏

望坎位奏

司筵撤席掌禮移次廻顧封壇恭臨坎位座玉埋俎藏  
芬歛氣是曰就幽成斯地意

斯郭本作此

祀五帝歌

皇夏

奠玉帛奏

庾信下同

嘉玉惟芳嘉幣惟量成形依禮稟色隨方神班有次歲

禮惟常威儀抑抑率由舊章

依郭作惟有郭作其

皇夏

初獻奏

惟令之月惟嘉之辰司壇宿設掌史誠陳敢用明禮言  
功上神鉤陳旦闢閭闔朝分旒垂象冕樂奏山雲將廻



震策暫轉天文五運周環四時代序鱗次玉帛循廻櫛

俎神其降之介福斯許

掌郭作長

青帝雲門舞

皇帝初獻奏下竝同

甲在日鳥中星禮東后奠蒼靈樹春旗命青史候鴈還  
東風起歌木德舞震宮泗濱石龍門桐孟之月陽之天  
億斯慶兆斯年

配帝舞

帝出于震蒼德於神其明在日其位居春勞以定國功  
以施人言從配祀近取諸身

赤帝雲門舞



招搖指午對南宮日月相會實沈中離光布政動溫風  
純陽之月樂炎精赤雀丹書飛送迎朱絃絳鼓罄虔誠  
萬物含養各長生

配帝舞

以炎爲政以火爲官位司南陸享配離壇二和實俎百  
味浮蘭神其茂豫天步艱難

黃帝雲門舞

三光儀表正四氣風雲同戊巳行初曆黃鍾始變宮平  
琮禮內鎮陰管奏司中齊壇芝曄曄清野桂馮馮夕牢  
芬六鼎安歌韻八風神光乃超忽嘉氣恒蔥蔥



配帝舞

四時咸一德五氣或同論猶吹鳳皇管尚對梧桐園器  
園居士厚位總配神尊始知今奏樂還用我雲門

白帝雲門舞

肅靈兌景承配秋壇雲高火落露白蟬寒帝律登年金  
精行令瑞獸霜輝祥禽雪映司藏肅殺萬寶咸宜厥田  
上上收功在斯輝郭作耀

配帝舞

金行秋令白帝朱宣司正五雉歌庸九川執文之德對  
越彼天介以福祉君子萬年



黑帝雲門舞

北辰爲政玄壇北陸之祀員官宿設玄璜浴蘭坎德陰  
風御寒次律將廻窮紀微陽欲動細泉管猶調於陰竹  
聲未入於春絃待歸餘於送曆方履慶於斯年

配帝舞

地始坼虹始藏服玄玉居玄堂沐蕙氣浴蘭湯匏器潔  
水泉香陟配彼福無疆君欣欣此樂康

隋園丘歌

隋書樂志曰文帝開皇中詔秘書監牛弘秘書丞姚察虞部侍郎許善心兼內史舍人虞世基東宮學士劉臻等詳定雅樂十四年三月樂定弘等奏曰伏奉明詔詳定雅樂博訪知音芻求



儒彥研校是非定其去就取爲一代正樂具在本司於是并撰歌辭三十首詔竝令施用見行者皆停之其人間音樂流僻日久棄其舊體者竝加禁約務存其本牛弘傳曰開皇九年奉詔改定雅樂又作樂府歌辭撰定圜丘五帝凱樂仁壽元年詔牛弘柳顧言許善心虞世基蔡徵等更詳故實創制雅樂歌辭其辭圜丘皇帝入至版位定奏昭夏之樂以降天神升壇奏皇夏之樂受玉帛登歌奏昭夏之樂皇帝降南陛詣壘洗洗爵訖升壇竝奏皇夏初升壇俎入奏昭夏之樂皇帝初獻奏誠夏之樂皇帝既獻作文舞之舞皇帝飲福酒作需夏之樂皇帝反爵於圜丘還本位奏皇夏之樂武舞出作肆夏之樂送神作昭夏之樂就燎位還大次竝奏皇夏

昭夏

降神奏

肅祭典協良辰具嘉薦俟皇臻禮方成樂已變感靈心  
迴天睠闢華闕下乾宮乘精氣御祥風望燿火通田燭



膺介圭受瑄玉神之臨慶陰陰煙衢洞宸路深善旣福  
德斯輔流鴻祚徧區宇

皇夏

皇帝升壇奏

於穆我君昭明有融道濟區域功格玄穹百神警衛萬  
國承風仁深德厚信洽義豐明發思政勤憂在躬鴻基  
惟永福祚長隆

君一作后

登歌

德深禮大道高饗穆就陽斯恭陟配惟肅血膺升氣冕  
裘標服誠感清玄信陳史祝祗承靈貺載膺多福

誠夏

皇帝初獻志



肇禋崇祀大報尊靈因高盡敬掃地推誠六宗隨兆五  
緯陪營雲和發韻孤竹揚清我粢既潔我酌惟明五神  
是鑒百祿來成

大報一作式奉書  
郭作訖就清一作聲

文舞

皇帝既獻奏

皇矣上帝受命自天睿圖作極文教遐宣四方監觀萬  
國陶甄有苗斯格無得稱焉天地之經和樂具舉休徵  
咸萃要荒式序正位履端秋霜春雨

需夏

皇帝飲福酒奏

禮以恭事薦以饗時載清玄酒備潔薌其迴旋分爵思  
媚軒墀惠均撤俎祥降受釐十倫以具百福斯滋克昌



厥德永祚鴻基

武舞

御曆膺期乘乾表則成功戡亂順時經國兵暢五材武  
弘七德憬彼遐裔化行充塞三道備舉二儀交泰情發  
自中義均莫大祀敬恭肅鍾鼓繁會萬國斯歡兆民斯  
賴享茲介福康哉元首惠我無疆天長地久

民隋書  
作人

昭夏

送神奏

享序洽祀禮施神之駕嚴將馳奔精驅長離耀牲煙達  
潔誠照騰日馭鼓電鞭辭下土升上玄瞻寥廓杳無際  
澹羣心留餘惠



# 五郊歌

隋書樂志曰五郊歌辭青郊奏角音赤郊奏徵音黃郊奏宮音白郊奏商音黑郊奏羽音迎送神登歌與

圓丘同

## 青帝歌角音

震宮初動木德惟仁龍精戒旦鳥曆司春陽光煦物溫  
風先導巖處載驚膏田已冒犧牲豐潔金石和聲懷柔  
備禮明德惟馨

## 赤帝歌徵音

長嬴開序炎上爲德執禮司萌持衡御國重離得位芒  
種在時含櫻薦實木槿垂蕤慶賞旣行高明可處順時



立祭事昭福舉

黃帝歌宮音

爰稼作土順位稱坤孕金成德履艮爲尊黃本內色宮  
實聲始萬物資生四時咸紀靈壇汎掃盛樂高張威儀  
孔備福履無疆

白帝歌商音

西成肇節盛德在秋三農稍已九穀行收金氣肅殺商  
威颺戾嚴風鼓莖繁霜隕蒂厲兵詰暴勅法慎刑明神  
降嘏國步惟寧

黑帝歌羽音



玄英啓候冥陵初起虹藏於天雉化於水嚴關重閉星  
迴日窮黃鍾動律廣莫生風玄樽示本天產惟質恩覃  
外區福流京室

京隋書  
作景

### 感帝歌

隋書樂志曰祀感帝奏誠  
夏迎送神登歌與圓丘同

### 誠夏

禘祖垂典郊天有章以春之孟於國之陽繭栗惟誠陶  
匏斯尚人神接禮明幽交暢火靈降祚火曆載隆烝哉  
帝道赫矣皇風

以春之孟郭  
作以孟之春

### 雩祭歌



隋書樂志曰雩祭蜡祭朝日夕月並奏誠夏其迎送神登歌並與圓丘同

誠夏

朱明啓候時載陽肅若舊典延五方嘉薦以陳盛樂奏  
氣序和平資靈祐公田旣雨私亦濡民殷俗富政化敷

民隋書  
作人

蜡祭歌

誠夏

四方有祀八蜡酬功收藏旣畢榛葛送終使之必報祭  
之斯索三時告勞一日爲澤神祇必來鱗羽咸致惟義  
之盡惟仁之至年成物阜罷役息民皇恩已洽靈慶無



垠

民隋書  
作人

朝日夕月歌

朝日誠夏

扶木上朝暾  
嵒山沈暮景  
寒來遊畧促  
暑至馳輝永  
時和合璧耀  
俗泰重輪明  
執圭盡昭事  
服冕罄虔誠

夕月誠夏

澄輝燭地域  
流耀鏡天儀  
曆草隨弦長  
珠胎逐望虧  
成形表蟾兔  
竊藥資王母  
西郊禮既成  
幽壇福惟厚

方丘歌

隋書樂志曰祭方丘惟  
此四首異餘竝同圓丘



昭夏

迎神奏

柔功暢陰德昭陳座典盛玄郊篚纂清管鬯馥皇情虔  
具寮肅笙頌合鼓鼗會出桂旗屯孔蓋敬如在肅有承  
神胥樂慶福膺

旗郭本作旌

登歌

奠玉帛奏

道惟生育器乃包藏報功稱範殷薦有常六瑚已饋五  
齊流香貴誠尚質敬洽義章神祚惟永帝業增昌

誠夏

獻皇地祇奏

厚載垂德崑丘主神陰壇吉禮北至良辰鑒水呈潔牲  
栗表純樽壺夕視幣玉朝陳羣望咸秩精靈畢臻祚流



於國社被於人

昭夏 送神奏

奠既徹獻已周竦靈駕逝遠遊洞四極帀九縣慶方流  
社恒遍埋玉氣掩牲芬晰神理顯國文

神州歌

隋書樂志曰祭神州奏社稷先農竝奏誠夏其迎送神登歌竝與方丘同

誠夏

四海之內一和之壤地曰神州物賴生長咸池既降泰  
圻斯饗牲牷尚黑珪玉寔兩九寓載寧神功克廣

社稷歌 四首



春祈社誠夏

厚地開靈方壇崇祀達以風露樹之松梓勾萌旣申芟  
柞伊始恭祈稟盛載膺休祉

春祈稷誠夏

粒食興教播厥有先尊神致潔報本惟虔瞻榆束耒望  
杏開田方憑馭福佇詠豐年

秋報社誠夏

北墉申禮單出表誠豐犧入薦華樂在庭原隰旣平泉  
流又清如雲已望高廩斯盈

秋報稷誠夏



民天務急農亦勤止或蓑或蓆惟豐惟芑涼風戒時歲  
云秋矣物成則報功施必祀

民隋書  
作人

先農歌

誠夏

農祥晨晰土膏初起春原俶載青壇致祀歛蹕長阡廻  
旌外壝房俎飾薦山疊沈滓親事朱弦躬持黛耜恭神  
務穡受禧降祉

先聖先師歌

誠夏

經國立訓學重教先三墳肇冊五典留篇開鑿理著陶



樂府  
卷三  
三  
鑄功宣東膠西序春誦夏弦芳塵載仰祀典無騫















